

# INUIT ATAQATIGIIT

## INATSISARTUNI



Nuuk, 27. februar 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Naaja H. Nathanielsen, Inuit Ataqatigiit)

### Apeqqutit:

- 1. Maannamiit ukiut aqqanillit aggersut ingerlaneranni qilleriviit marluk qalluiffigilereersimanissaannik ilimasunneq tunngavigalugu aatsitassarsiornermi aningaasaateqarfiup 2060-mi 435 milliardinik imaqalerumaarsimanissaannik naatsorsuinerup naleqquttuunera Naalakkersuisut aalajangiusimavaat?**
- 2. Kikkut 2025-mi qilleriviit marluk qalluiffigilersimanissaannik takorluuineq suliareqqaarpat? Pricewaterhousecoopers (PWC)-ip imaluunniit taamani Aatsitassanut Pisorta qarfiusup?**
- 3. Naalakkersuisut isumaqarpat ukiut arfiniliinnaat qaangiuppata uuliaqarfimmi ataatsimi qalluilereersimasoqarnissaa ilimanavissoq?**
- 4. Nunaoilip uuliasiornermi akuersissutinik piginneqataassuteqarluni peqataanera Naalakkersuisut 6,25%-imut affaannangortippaat. Kisianni Nunaoilip qalluinermi 12,5%-imik peqataanera PWC-ikkut naatsorsuineranni tunngavigineqarpoq. Suna pillugu Naalakkersuisut periusissiaminnut naatsorsuinertaanik allangortitsiffigalugulu atorunnaarsitsiffigeqqammisaminnut naatsorsuineq ilannguppaat?**
- 5. Ullumikkut akuersissutinit tamarmiusunit uuliasiornermi akuersissutit qassit ingerlatseqatigiiffinnit ataatsimut kattussimasunit pigineqarpat? Naalakkersuisut isumaqarpat akuersissutit uuliasiorfiutileqatigiiffinnit ataasiinnaangitsunit pigineqartarnerat qaqutigoortuusoq?**

### Tunngavilersuut:

Aningaasaqarnikkut ilimasunnernik naatsorsuinernillu pivusorsiorpalaangitsunik saqqummiussaqaqarnarlugit uuliasiornermut aatsitassarsiornermullu periusissiap nutaap tusarniaassutigineqarnerani Naalakkersuisut isornartorsiorneqarput.

Periusissiami Naalakkersuisooqatigiit akuereqqammisaanni qilleriviit marluk ukiut arfinillit ukiullu aqqanillit ingerlaneranni qalluiffiulersimanissaannik najoqqutassaq Naalakkersuisut saqqummiuppaat. Qilleriviit taakkuinnaalluunniit tunngavigalugit Aatsitassarsiornermi Aningaasaateqarfik 2060-imi 435 milliardit sinnerlugit imaqalereersimassasoq ilimasaarutigineqarpoq.

Ilisimatuulli inuillu uuliasiornermik suliaqarfimmiut naliliipput naatsorsuinerit ilimasunnerillu taamaattut pivusorsiorpalaangitsut. Isornartorsiuinernut akillutik Naalakkersuisut oqarput kisitsit pineqartut Akileraartarnermut Atugarissaarnermullu Ataatsimiititaliap isumaliutissiisutaaninngaanneersuusut.

Kisiannili Akileraartarnermut Atugarissaarnermullu Ataatsimiititaliap isumaliutissiisutaani atuarneqarsinnaavoq taakku 435 milliarder Aatsitassarsiornermi Aningaasaateqarfimmut

nakkartussat ataatsimiititaliap naatsorsorsimangikkai, kisiannili Pricewaterhousecoopers (PWC)-ip<sup>1</sup>.

Taamani Aatsitassanut Pisortaqarfiusup akiligaanik PWC ataasiarluni suliakkerneqarnikuuvog najoqqutassani assigiinngitsuni aningaasarsiornikkut iluanaarutissat naatsorsorneqarneri pillugit oqaaseqaasioqqullugu. Oqaaseqaat taanna Akileraartarnermut Atugarissaarnermullu Ataatsimiititaliamut tunniunneqarsimavoq.

PWC-ip oqaaseqaasiaani/naatsorsuusuaani **naatsorsuutigineqarpoq** qillerivinni taakkunani takorluukkersaarutaasuni qalluinermi Nunaoil A/S 12,5%-imik piginneqataassuteqarluni peqataassasoq. Kisiannili Naalakkersuisut periusissiaanni atuarneqarsinnaavoq Nunaoilip peqataanera maanna 6,25%-imut appartinneqarsimasoq.

KNR-imi Oqalliffimmi den 18. februar aallakaatinneqartumi Aatsitassaqaarnermut Inuus-sutissarsiornermullu Naalakkersuisoq isumaqarnerarpoq uuliasiornermi akuersissutini Nunaoilip peqataanerata affaannanngortinneqarnissaa kinguneqassanngitsoq. Naalakkersuisoq oqarpoq suliniut aalajangersimasoq sunniuteqarfiginiassagaanni 51%-imik peqataanissaq pisariaqartoq. Oqaaseqaalli tamanna pissutsinut piviusunut naapertuutinngilaq, tassami uuliasiorfiutileqatigiiffiit ataasiakkaat akuersissummik piginneqatigiillerlutik ataatsimut kattussuuttarnerat nalinginnaavoq. Taamaalilluni 12,5%-imik peqataaneq isumal-lerujussuusinnaavoq.

Apeqqutit ullut suliffiusut qulit qaangiutsinnagit akineqaqquneqarput.

---

<sup>1</sup> Takuuk isumaliutissiissutip kalaallisuuani qupperneq 518 aamma qupperneq 520, tabel 10.2